

四庫全書

史部

欽定四庫全書

史部

元和郡縣志卷三

詳校官編修

臣曹

城

檢討

臣

德生覆勘

總校官庶吉士

臣

倉聖脉

校對官中書

臣

王家賓

謄錄監生

臣

陳炳

謄錄監生

臣

朱連傑

欽定四庫全書

史部十一

元和郡縣志

地理類二

總志之屬

提要

臣等謹案元和郡縣志四十卷唐李吉甫撰
吉甫字宏憲趙州贊皇人宰相栖筠之子以
蔭補左司禦率府倉曹參軍貞元初為太常
博士官至中書侍郎同中書門下平章事卒
謚忠懿事迹具唐書本傳據宋洪邁跋稱為

元和八年所上然書中更置宥州一條乃在
元和九年蓋其事為吉甫所經畫故書成之
後又自續入之也前有吉甫原序稱起京兆
府盡隴右道凡四十七鎮成四十卷每鎮皆
圖在篇首冠于叙事之前並目錄兩卷共成
四十二卷故名曰元和郡縣圖志後有淳熙
二年程大昌跋稱圖至今已亡獨志存焉故
書錄解題惟稱元和郡縣志四十卷此本又

闕第十九卷二十卷二十三卷二十四卷二十六卷三十六卷其第十八卷則闕其半二十五卷亦闕二頁又非宋本之舊矣篇目斷續頗難尋檢考水經注本四十卷至宋代佚其五卷故水名闕二十有一南宋刊版仍均配為四十卷使相聯屬今用其例亦重編為四十卷以便循覽仍註其所闕于卷中以存舊第其書唐志作五十四卷證以吉甫之原

序蓋志之誤又按唐六典及新舊唐書地理志貞觀初分天下為十道一關內道二河南道三河東道四河北道五山南道六隴右道七淮南道八江南道九劍南道十嶺南道此書移隴右為第十殆以中葉後陷沒吐蕃故退以為殿至淮南一道在今本缺卷之中以唐志淮南道所屬諸州考之今本河南道內有所屬申光二州列蔡州之後江南道內有所屬蘄黃安三

州列鄂沔二州之後似乎傳寫之錯簡然考
唐書方鎮表大厯十四年淮西節度使復治
蔡州尋更號申光蔡節度使又永泰元年蘄
黃二州隸鄂岳節度升鄂州都團練使為觀
察使增領岳蘄黃三州元和元年升鄂州觀
察使為武昌軍節度使增領安黃二州則申
州光州嘗由淮南道割隸河南道蘄州安州
黃州亦嘗由淮南道割隸江南道唐志偶失

移併非今本錯亂也輿記圖經隋唐志所著錄者率散佚無存其傳于今者惟此書為最古具體例亦為最善後來雖遞相損益無能出其範圍今錄以冠地理總志之首著諸家祖述之所自焉乾隆四十六年十一月恭校上

總纂官

臣紀昀
臣陸錫熊
臣孫士毅

總校官

臣陸費墀

原序

金紫光祿大夫中書侍郎同中書門下平章事兼集
賢殿大學士監修國史上柱國趙國公臣李吉甫撰
臣聞王者建州域物土疆觀次于星躔察法于地理攷
中國山河之象求二儀險阻之情天漢明而兩界分南
宮正而五均敘自黃帝之方制萬國夏禹之分別九州
辨方經野因人緯俗其揆一矣及秦皇并六國則罷侯
而置守漢武討百蠻則窮兵而黷武雖裂為郡縣者遠

過于殷周而教令之所行威懷之所服亦不越于三代
失天地作限之意非皇王尚德之仁誇志役心久而後
悔由此觀之則聖人疆理之制固不在荒遠矣我國家
肇自貞觀至于開元兼夏商之職貢掩秦漢之文軌梯
航累乎九譯廐置通乎萬里然後分疆以辨之置吏以
康之任所有而差貢賦因所宜而制名物守其要害險
其走集經理之道冠乎百王巍巍乎無得而稱矣易曰
天險不可升地險山川邱陵王公設險以守其國險之

時用大矣哉然則聖人雖設險而未嘗恃險施于有備之內措于立德之中其用常存其機不顯弛張開闔因變制權所以裁成二儀統理萬物故漢祖入關諸將爭走金帛之府惟蕭何收秦圖書高祖所以知山川阨塞戶口虛實厥後受命汜水定都洛陽留侯演委輅之謀田肯賀入關之策事關興替理切安危舉斯而言斷可識矣伏惟睿聖文武皇帝陛下握樞秉聖承祧立極祖堯舜之道憲文武之程皇王之遐蹤行之必至祖宗之

耿光寢而復耀天寶之季王塗蹙艱由是墜網解而不
紐強侯傲而未肅逮至興運盡為驅除故蜀有阻隘之
夫吳有憑江之卒雖完保聚繕甲兵莫不手足裂而異
處封疆一乎四海故鄜衛風偃朔塞砥平東西南北無
思不服臣吉甫當元聖撫運之初從內庭視草之列尋
備袞職久塵台階每自循省赧然收汗謨明弼諧誠淺
智之不及簿書期會亦散材之不工久而伏思方得所
効以為成當今之務樹將來之勢則莫若版圖地理之

為切也所以前上元和國計簿審戶口之豐耗續撰元和郡縣圖志辨州域之疆理時獲省閒或裨聰明豈欲希鄴侯之規模庶乎盡朱贛之條奏況古今言地理者凡數十家尚古遠者或搜古而畧今採謠俗者多傳疑而失實飾州邦而敘人物因邱墓而徵鬼神流于異端莫切根要至于邱壤山川攻守利害本于地理者皆畧而不書將何以佐明王扼天下之吭制羣生之命收地保勢勝之利示形東壤制之端此微臣之所以精研聖

后之所宜周覽也謹上元和郡縣圖志起京兆府盡隴
右道凡四十七鎮成四十卷每鎮皆圖在篇首冠于敘
事之前并目錄兩卷總四十二卷臣學非博聞識愧經
遠馳驚雖久漏畧猶多輕瀆宸嚴退增戰越謹上

欽定四庫全書

元和郡縣志卷一

唐李吉甫撰

關內道

京兆府

雍州

開元戶三十六萬二千九百九
元和戶二十四萬一千二百二

禹貢雍州之地舜置十二牧雍其一也周武王都豐鎬
平王東遷以岐豐之地賜秦襄公至孝公始都咸陽秦

兼天下置內史以領關中項籍滅秦分其地為三以章

邯為雍王都廢丘

今興平縣是也

司馬欣為塞王都櫟陽董翳

為翟王都高奴

今延州金明縣是也

謂之三秦高祖入關定三秦

復并為內史景帝分置左右內史武帝太初元年改內

史為京兆尹後與左馮翊右扶風謂之三輔其理俱在

長安城中又置司隸校尉以總之光武都洛陽以關中

地置雍州尋復立三輔魏分河西為涼州分隴右為秦

州三輔仍舊屬司隸晉初省司隸復置雍州愍帝之後

劉聰石勒苻健姚萇相繼竊據之萇孫泓為劉裕所滅
東晉復置雍州及京兆郡尋為赫連勃勃所破遣子隗
鎮長安號曰南臺後魏太武破赫連昌復于長安置雍
州孝武自洛陽遷長安改為京兆尹隋開皇三年自長

安故城遷都龍首川即今都城是也

初隋氏營都宇文
愷以朱雀街南北

有六條高坡為乾卦之象故以九二置宮殿以當帝王
之居九三立百司以應君子之數九五貴位不欲常人
居之故置玄都觀及興善寺以鎮之大明宮即聖唐高
宗龍朔二年所置高宗嘗染風痺以大內湫濕置宮于
斯其地即龍首山之東麓北據高原南俯城邑每晴天
霽景視終南如指掌含元殿所居高明尤得地勢大明

東南曰興慶宮
玄宗藩邸宅也

廢京兆尹又置雍州煬帝改為京兆郡

武德元年復為雍州開元元年改為京兆府謹按漢五
年高祖在洛陽婁敬說曰陛下都洛陽豈欲與周室比
隆哉周之都洛以為此天下之中四方納貢職道里均
有德則易以王無德則易以亡凡居此者欲令務以德
致人不欲阻險令後世驕奢也今陛下而欲比隆成康
之時為不侔矣且夫秦地被山帶河四塞以為固猝然
有急百萬眾可具因秦之故資甚美膏腴之地此所謂

天府陛下入關而都之山東雖亂秦故地可全而有也
夫與人鬪不搯其吭拊其背未能全勝今陛下入關而
都按秦之故此亦搯天下之吭而拊其背也高祖問羣
臣羣臣皆山東人爭言周王數百年秦二世則亡不如
都周高祖疑未能決及留侯明言入關便即日駕西都
關中六年擒韓信田肯賀高祖曰甚善陛下得韓信又
治秦中秦形勝之國帶河阻山持戟百萬秦得百二焉
地勢便利其以下兵于諸侯譬猶居高屋之上建瓴水

也自漢至今常為王者與區

府境

東西三百一十里
南北四百七十里

八到

東至東都八百三十五里
東至華州一百八十里

東南至商州二百六十五里

南取庫谷路至金州六百八十里

西南至洋州六百三十里

正西微北至鳳翔三百一十里

西北至邠州三百里

東北至坊州一百五十里

正東微北至同州二百五十里

貢賦

開元貢

葵草席
絹綿

地骨白皮

酸棗仁

管縣二十三

萬年 長安 昭應 三原 醴泉 奉天

奉先 富平 雲陽 咸陽 渭南 藍田

興平 高陵 櫟陽 涇陽 美原 華原

同官 鄠 藍屋 武功 好畤

萬年縣 赤

本漢舊縣屬馮翊在今櫟陽縣東北三十五里周明帝二年分長安霸城山北等三縣始于長安城中置萬年

縣隋開皇三年遷都改為大興縣理宣陽坊

案是書因避唐高宗

諱凡治字皆作理今遇引用經史語改從治字餘仍原本

武德元年復為萬年乾封

元年分置明堂縣理永樂坊長安三年廢天寶七年改為咸寧乾元元年復名萬年縣

終南山在縣南五十里按經傳所說終南山一名太一亦名中南據張衡西京賦云終南太一隆崛崔嵬潘岳西征賦云九嵎叢薛太一巖從面終南而背雲陽跨平原而連嶠冢然則終南太一非一山也

畢原在縣西南二十八里詩注云畢終南之道名也書序云周公薨成王葬于畢是也

白鹿原在縣東二十里亦謂之霸上漢文帝葬其上謂之霸陵王仲宣詩曰南登霸陵岸迴首望長安即此也長樂坡在縣東北十二里即滄川之西岸舊名滄坂隋文帝惡其坂名改曰長樂坡

故軹道在縣東北一十六里即秦王子嬰降沛公之處也

細柳營在縣東北三十里相傳云周亞夫屯軍處今按亞夫所屯在咸陽縣西南二十里言在此非也

杜陵在縣東南二十里漢宣帝陵也

渭水在縣北五十里

舊云北去縣五十里

灞水在縣東二十里灞橋隋開皇三年造唐隆二年仍舊所創制為二南北兩橋

樊川一名後寬川在縣南三十五里本杜陵之樊鄉漢高祖賜樊噲食邑于此

御宿川在縣南三十七里漢為離宮別館禁御人不得往來遊觀止宿其中故曰御宿

長安縣

赤

本秦舊縣初楚懷王封項羽為長安侯則長安久矣非始于漢但未詳所在耳及高帝五年入關復置長安縣乃取舊名以名縣也至隋開皇三年遷都長安縣移至長壽坊西南隅乾封元年分置乾封縣理懷真坊長安三年廢

龍首山在縣北一十里長六十里頭入渭水尾達樊川
秦時有黑龍從南山出飲水其行道因成土山疏山為
臺殿不假版築高出長安城西京賦所云疏龍首以抗
殿也

三輔黃圖曰營未央宮因龍首制前殿也

細柳原在縣西南三十三里別是一細柳非亞夫屯軍之所

長安故城在縣西北十三里漢舊都惠帝修築本秦離宮也按惠帝元年正月城長安三年春發長安六百里

內男女十四萬六千人三十日罷六月發徒隸二萬人
常役至五年正月發十四萬五千人三十日罷九月而
城成城南為南斗形城北為北斗形周迴六十五里

太和宮在縣南五十五里終南山太和谷武德八年造
貞觀十年廢二十一年以時熟公卿重請修築于是使
將作大匠閻立德繕理焉改為翠微宮今廢為寺

周武王宮即鎬京也在縣西北十八里自漢武帝穿昆
明池于此鎬京遺址淪陷焉

秦阿房宮在縣西北十四里殿東西五百步南北五十丈上可坐萬人下可建五丈旗表南山以為闕為複道自阿房渡渭屬之咸陽庭中可受十萬人又置銅人十二于宮前

漢長樂宮在縣西北十四里

漢未央宮在縣西北十五里並在長安故城中

漢建章宮在縣西二十里長安故城西太初元年柏梁臺災越巫以厭勝之術請作建章宮為千門萬戶

桂宮在縣北十三里長安故城中漢武帝所造

柏梁臺在長安故城中未央宮北

漸臺在未央宮西王莽死于此

神明臺在縣西北二十里長安故城西上有承露盤

漢博望苑在縣北五里武帝為太子據所立使通賓客

上林苑在縣西北一十四里周匝二百四十里相如所

賦也

酒池在長樂宮中漢武帝所作以誇羌胡飲以鐵盃重

不能舉皆低頭牛飲西征賦云酒池鑒于商辛追覆車而不寤

子午關在縣南百里王莽通子午道因置此關魏遣鍾會統十萬餘衆分從斜谷駱谷子午谷趨漢中晉桓溫伐秦命司馬勲出子午道今洋州東二十里曰龍亭此入子午谷之路梁將軍王神念以舊道緣山避水橋梁多壞乃別開乾路更名子午道即此路是也

新豐故城在縣東十八里漢新豐縣城也漢七年高祖

以太上皇思東歸于此置縣徙豐人以實之故曰新豐
并移粉榆舊社街衢棟宇一如舊制男女老幼各知其
室雖雞犬混放亦識其家焉

古戲亭在縣東北三十里周幽王為犬戎所逐死于戲
即此也周章軍西至戲秦將章邯拒破之亦此地也

周幽王陵在縣東北二十五里

秦始皇陵在縣東八里始皇即位治驪山陵役徒七十
萬人今按其陵高大亦不足役七十萬人積年之功蓋

以驪山水泉本北流者陂障使東西流又此土無石取大石于渭北諸山其費功力由此也

華清宮在驪山上開元十一年初置溫泉宮天寶六年

改為華清宮又造長生殿及集靈臺以祀神

案前京兆府管縣目

萬年長安下有昭應舊唐書地理志云昭應隋新豐縣治古新豐城北垂拱二年改為慶山縣神龍元年復為新豐天寶二年分新豐萬年置會昌縣七載省新豐縣改會昌為昭應治溫泉宮之西北新唐書云天寶元年更驪山曰會昌山三載析新豐萬年置會昌縣六載更溫泉曰華清宮七載省新豐更會昌縣及山曰昭應據二書則華清宮在昭應縣是書無昭應縣志文既與前目不符而以華清宮附長安縣其所缺在前在後未可

臆斷附識于此以
存昭應縣大畧

三原縣

次赤西南至府一百一十里

本漢池陽縣巖薛山在今縣西北六十里符秦于此山
北置三原護軍以其地西有孟侯原南曰豐原北曰白
鹿原後魏太武七年罷改置三原縣屬北地郡明帝孝
昌三年蕭寶寅逆亂毛洪賓立義捍賊永安元年于此
置北雍州洪賓為刺史亦謂之洪賓柵其故城在縣北
五十五里又割北地郡之三原縣于此置建忠郡以旌

其功隋開皇三年罷郡以縣屬雍州

高祖獻陵在縣東十五里

堯門山在縣西北三十二里

天齊原在縣西北二十五里上有天齊祠

黃白城在縣西南十五里後漢李傕亂政天子東遷三
輔饑歉乃移保黃白城即其地也

秦曲梁宮在縣西南十五里黃白城內

于謹墓在縣北十八里

醴泉縣

次赤東南至府一百二十里

本漢谷口縣地在九嵎山東仲山西當涇水出山之處故謂之谷口溝洫志云白渠首起谷口尾入櫟陽袤二百里溉田四千五百餘頃民得其饒歌曰田于何所池陽谷口鄭國在前白渠起後涇水一石其泥數斗且溉且糞長我禾黍衣食京師億萬之口謂此也後漢及晉又為池陽縣後魏改為寧夷縣隋開皇十八年改為醴泉縣以縣界有周醴泉宮因以為名

太宗昭陵在縣東北二十五里九嵎山

肅宗建陵在縣東北十八里武將山

奉天縣

次赤東南至府一百六十里

光宅元年割醴泉始平好畤武功新平郡之永壽五縣置

梁山高宗天皇大帝乾陵所在因名曰奉天其山即禹貢所云壺口治梁及岐又古公亶父踰梁山至于岐下及秦立梁山宮皆此山也

奉先縣

次赤西南至府二百四十里

本秦重泉縣後魏省至孝文帝分白水縣置南白水縣
西魏改為蒲城縣本屬同州開元四年以縣西北三十
里有豐山于此置睿宗橋陵改為奉先縣隸京兆

玄宗泰陵在縣東北二十里

惠莊太子陵在橋陵東南三里

惠宣太子陵在橋陵東六里

惠文太子陵在橋陵東三里並在柏城內

富平縣

次赤西南至府一百五十里

本漢舊縣屬北地郡後魏文帝自懷德城移于今理周閔帝于縣置中華郡武帝省郡以縣屬馮翊隋開皇三年改屬雍州

中宗定陵在縣西北十五里龍泉山

代宗元陵在縣西北四十里檀山

順宗豐陵在縣東北三十三里甕金山

節愍太子陵在縣西北十五里

荆山在縣西南二十五里岐山之東禹貢云荆岐既旅是也

鹽池澤在縣東南二十五里周迴二十里

後周文帝成陵在縣西北十五里

王翦墓在縣東北三里

司馬欣墓在縣西二十五里章邯長史降項羽封為塞

王

雲陽縣

次赤西南至府一百二十里

本漢舊縣屬左馮翊魏司馬宣王撫慰關中罷縣置撫夷護軍及趙王倫鎮長安復罷護軍劉石苻姚因之魏罷護軍更于今理別置雲陽縣後周置雲陽郡開皇初郡廢武德元年分置石門縣三年于石門縣置泉州貞觀元年廢州改石門縣為雲陽縣

德宗崇陵在縣東二十里

嵯峨山一名嵯峨山在縣東北十里東西二十五里南北二十里山上有雲必雨常以為候

甘泉山一名磨石嶺在縣西北九十里周迴六十里
車箱阪在縣西北三十八里縈紆曲折單軌纔通上阪
即平原宏敞樓觀相屬即趨甘泉宮道也

涇水在縣西南二十五里初鄭國分涇水置鄭渠後倪
寬又穿六輔渠今此縣與三原界六道小渠猶有存者
謹按秦始皇元年韓聞秦好興事欲疲之乃使水工鄭
國間說令鑿涇水自仲山西瓠口為渠東注洛三百餘
里欲以溉田中作而覺秦欲殺國國曰始臣為間然渠

成亦秦之利秦以為然卒使就渠既成溉澤鹵之地四萬頃畝皆一鍾關中無凶年命為鄭國渠後至漢武帝元鼎六年一百三十六歲倪寬為左內史又奏請穿六輔渠以益溉鄭渠旁高卬之田後十六歲趙中大夫白公又奏穿涇水注渭中溉田四千餘頃人得其饒而歌之大唐永徽六年雍州長史長孫祥奏言往日鄭白渠溉田四萬餘頃今為富僧大賈競造碾磑止溉一萬許頃于是高宗令分檢渠上碾磑皆毀撤之未幾所毀皆

復廣德二年臣吉甫先臣文獻公為工部侍郎復陳其
弊代宗亦命先臣撤去私碾磴七十餘所歲餘先臣出
牧常州私制如初至大厯中利所及纔六千二百餘頃
漢雲陽故縣在縣西北八十里

雲陽宮即秦之林光宮漢之甘泉宮在縣西北八十里
甘泉山上周迴十餘里去長安三百里望見長安城黃
帝以來祭天園丘處也齊人少翁謂武帝曰上即欲與
神通宮室被服非像神神物不至乃于甘泉宮中為臺

畫天地太一諸鬼神而祭之又作柏梁銅柱承露盤仙人掌之屬帝以五月避暑于此八月乃還

通天臺在縣西北八十一里甘泉宮中高三十五丈望雷雨悉在下

咸陽縣

畿正東微南至府四十里

本秦舊縣也孝公十二年于渭北城咸陽自汧隴徙都焉秦自孝公惠文悼武昭襄莊襄王始皇胡亥並都之始皇二十六年初并天下收天下兵聚之咸陽鑄以為

鍾鐻金人十二各重千石置庭中徙天下豪富于咸陽
十二萬戶每破諸侯倣其宮室作之咸陽北阪上以所
得諸侯美人鐘鼓充之咸陽之旁二百里內宮觀二百
七十土木皆被綈繡宮人不移樂不改縣窮年忘歸猶
不能徧至胡亥時天下叛秦漢元年秦王子嬰降漢項
羽引兵西屠咸陽殺子嬰燒秦宮室火三月不滅及漢
興以為渭城縣屬右扶風按秦咸陽在今縣東二十二
里漢渭城縣亦理于此符堅時改為咸陽郡後魏移咸

陽縣于涇水北今涇陽縣理是也隋開皇九年改涇陽
為咸陽大業三年廢入涇陽縣城本杜郵也武德元年
置白起堡二年置縣又加營築焉山南曰陽水北曰陽
縣在北山之南渭水之北故曰咸陽

畢原即縣所理也左傳曰畢原酆郇文之昭也即謂此
地原南北數十里東西二三百里無山川陂湖井深五
十丈亦謂之畢陌漢氏諸陵並在其上

短陰原在縣西南二十里

渭水南去縣三里

臨臯驛在縣東南二十里

長陵故城在縣東北三十里初漢徙關東豪族以奉陵
邑長陵茂陵各萬戶其餘五陵各千戶皆屬太常不隸
于郡

秦蘭池宮在縣東二十五里

秦磁石門在縣東南十五里東南有閣道即阿房宮之
北門也累磁石為之著鐵甲入者磁石吸之不得過羌

胡以為神

細柳倉在縣西南二十里漢舊倉也周亞夫軍次細柳即此是也張揖云在昆明池南恐為疎遠

棘門在縣東北十八里本秦關門也漢文帝使將軍徐厲屯棘門謂此也

蘭池陂即秦之蘭池也在縣東二十五里初始皇引渭水為池東西二百里南北二十里築為蓬萊山刻石為鯨魚長二百丈始皇嘗微行遇盜于蘭池見窘使武士

擊殺盜關中大索二十日

中渭橋在縣東南二十二里本名橫橋架渭水上始皇都咸陽渭水貫都以象天漢橫橋南渡以法牽牛渭水南有長樂宮渭水北有咸陽宮欲通二宮之間故造此橋漢末董卓燒之魏文帝更造劉裕入關又毀之後魏重造貞觀十年移于今所

便橋在縣西南十里架渭水上武帝建元三年初作便門橋在長安北茂陵東去長安二十里長安城西門曰

便門此橋與門相對故名便橋

白起祠在縣城中

漢長陵在縣東三十里高帝陵也

安陵惠帝陵也在縣東北二十里

陽陵景帝陵也在縣東四十里

平陵昭帝陵也在縣西北二十里

渭陵元帝陵也在縣西北七里

延陵成帝陵也在縣西北十三里

義陵哀帝陵也在縣北八里

康陵平帝陵也在縣西北九里

太公墓在縣東北十里

周公墓在縣北十三里

蕭何墓在縣東北三十七里

曹參墓在縣東北三十五里

張良墓在縣東北三十六里

蒙恬祠在縣西北十五里

渭南縣畿西至府一百三十里

本漢新豐縣地符秦時置後魏孝明帝

亦云孝文帝

于今縣

東南四里置渭南郡及南新豐縣西魏廢帝二年改南

新豐為渭南縣武德元年屬華州五年改屬雍州

倒獸山一名玄象山在縣東南五十里王子年隱處也

渭水北去縣四里

酋水出縣西南石樓山北入渭

隋崇業宮在縣東十五里

秦步高宮在縣西南二十里

藍田縣

畿東北至府八十里

本秦孝公置按周禮玉之美者曰球其次為藍

案今周禮無此

文杜佑通典藍田縣下亦有是語而不云周禮

蓋以縣出美玉故曰藍田周閔

帝割京兆之藍田又置玉山白鹿二縣置藍田郡至武

帝省郡復為藍田縣屬京兆後遂因之縣理城即峽柳

城也俗亦謂之青泥城桓溫伐苻健使將軍薛珍擊青

泥城破之即其處也

藍田山一名玉山一名覆車山在縣東二十八里

白鹿原在縣西六里晉桓溫伐苻健督護鄧遐等奮擊于白鹿原即此地也

灞水故滋水也即秦嶺水之下流東南自商州上洛縣界流入又西北流合滻水入渭

思鄉城在縣東南三十三里宋武帝征關中築城于此南人思鄉因以為名

藍田關在縣東南九十里即峽關也秦趙高將兵拒峽

關沛公引兵攻峽關踰蕢山擊秦軍大破之
蕢山在縣東南二十五里

元和郡縣志卷一

欽定四庫全書

元和郡縣志卷二

唐 李吉甫 撰

關內道 二

京兆府

萬年縣至藍田縣志文見前卷此卷自興平縣起

興平縣

畿東至府九十里

本漢平陵縣屬右扶風魏文帝改為始平晉武改置始平國領槐里縣歷晉至西魏數有移易景龍二年金城

公主出降吐蕃中宗送至此縣改始平縣為金城縣至德二年改名興平

始平原在縣北十二里東西五十里南北八里東入咸陽界西入武功界

渭水南去縣二十九里

馬牧澤在縣東南二十里南北廣四里東西二十一里百頃澤在縣西二十五里多蒲魚之利周迴六十里

槐里城周曰犬丘秦改名廢丘周懿王所都項羽封章

邯為雍王都廢丘亦此城也

武學故城在縣東南十里

馬嵬故城在縣西北二十三里馬嵬于此築城以避難
未詳何代人也

漢龍泉廟在縣東北二十四里武帝廟號也

漢黃山宮在縣西南三十里武帝微行西至黃山宮即
此也

章邯臺在縣東南十里

漢茂陵在縣東北十七里武帝陵也在槐里之茂鄉因以為名守陵溉樹掃除凡五千人

漢公孫弘墓在縣東北十八里

衛青墓在縣東北十九里起冢象廬山

霍去病墓在縣東北十九里起冢象祁連山

高陵縣畿西南至府八十里

本秦舊縣孝公置漢屬左馮翊魏文帝改為高陸屬京兆郡大業二年復為高陵

龍躍宮在縣西十四里高祖太武皇帝龍潛舊居也武德六年置

姚興墓在縣東南十三里

櫟陽縣

畿西南至府一百里

本秦舊縣獻公自雍徙居焉屬左馮翊項羽立司馬欣為塞王亦都之按高帝既葬太上皇于櫟陽之萬年陵遂分櫟陽置萬年縣以為陵邑理櫟陽城中故櫟陽城亦名萬年城後漢省櫟陽入萬年後魏宣武帝又分置

廣陽縣周明帝省萬年入廣陽更于長安城中別置萬年縣廣陽仍屬馮翊郡隋開皇三年罷郡廣陽縣屬雍州武德元年又改為櫟陽縣

煮鹽澤在縣南十五里澤多鹹鹵符秦時于此煮鹽周迴二十里

清泉陂在縣西南十里多水族之利

漢太上皇陵在縣東北二十五里

涇陽縣

畿南至府七十里

本秦舊縣漢屬安定郡惠帝改置池陽縣屬左馮翊故城在今縣西北二里以其在池水之陽故曰池陽後魏廢于今縣置咸陽郡符秦又置涇陽縣隋文帝罷郡移涇陽縣于咸陽郡屬雍州即今縣是也

石安原在縣南七里高二十丈東西三十八里南入咸陽縣界

長平坂

一作坡

在縣西南五里

涇水西北自池陽縣界流入經縣南七里又東南入高

陵縣界春秋襄公十四年諸侯伐秦濟涇而次秦人毒涇師人多死

焦獲藪亦名瓠口爾雅十藪周有焦獲詩云獫狁匪茹整居焦獲即謂此也按韓水工鄭國說秦令鑿涇水自仲山西抵瓠口為渠即所謂鄭白二渠是也

秦望夷宮在縣東南八里北臨涇水以望北夷故名之胡亥死于此

漢池陽宮在縣西北八里

龍泉陂在縣南三里周迴六里多蒲魚之利

太白渠在縣東北十里

中白渠首受太白渠東流入高陵縣界

南白渠首受中白渠水東南流亦入高陵界

美原縣

畿西南至府一百八十里

秦漢頻陽之地以縣西北十一里有頻山秦厲公子山南立縣故曰頻陽後魏別立土門縣以頻山有二土門狀似門故曰土門大業二年省義寧二年再置貞觀十

七年又省咸亨二年復置改名曰美原

頻陽故城在縣西南三里秦將王翦即此縣人也

華原縣

畿西南至府一百六十里

本漢祿祔縣地屬左馮翊魏晉皆于其地置北地郡元魏廢帝三年改為通川郡領泥陽縣屬宜州六年改泥陽為華原縣大業二年省宜州縣屬京兆垂拱元年改為永安縣天授二年又置宜州大定元年廢神龍元年復為華原縣

土門山在縣東南四里

役祠故城在縣東南十里漢縣也宣帝神雀二年鳳凰
集役祠城是也

泥陽故縣在東南十七里

漢步壽宮在縣東北三里

同官縣

畿西南至府二百一十里

本漢役祠縣地屬左馮翊晉屬頻陽苻秦于役祠城東
北銅官川置銅官護軍後魏太武帝改置銅官縣屬北

地郡周朝除金作此同字屬宜州大業二年省宜州縣屬雍州國朝因之

鄠縣

畿東北至府六十五里

本夏之扈國啟與有扈戰于甘之野地理志古扈國有戶谷戶亭又有甘亭扈至秦改為鄠邑漢屬右扶風自後魏屬京兆後遂因之

終南山在縣東南二十里

雞頭山在縣東南三十一里偽趙主石生不能守長安

欲西上隴士卒散盡遂入雞頭山尋為追兵所害

牛首山在縣西南二十三里南接終南在上林苑中西京賦云繞黃山而款牛首是也澇水所自出

渭水北去縣十七里

豐水出縣東南終南山自發源北流經縣東二十八里北流入渭

龍臺澤在縣東北三十里周迴二十五里

八部澤在縣東南五里周迴五十里

故鄆城在縣北二里夏之扈國也

鍾官故城一名灌鍾城在縣東北二十五里蓋始皇收天下兵器銷為鍾鑪此或其處

馬祖壇在縣東北三十二里龍堂澤中每年太常太僕四時祭之春祭馬祖夏祭先牧秋祭馬社冬祭馬步

隋太平宮在縣東南三十一里對太平谷因名之
隋甘泉宮在縣西南二十二里對甘泉谷因名之

周鄴宮文王宮也在縣東三十五里詩云既伐于崇作

邑于豐是也崇侯無道文王伐之命無殺人無壞室崇人聞之如歸父母遂虜崇侯作豐邑崇國在秦晉之間秦蒯陽宮在縣西南二十三里

美陂在縣西五里周迴十四里

甘亭在縣西南五里夏啟伐有扈誓師于甘之野即此處也

盩屋縣

畿東北至府一百三十里

漢舊縣武帝置屬右扶風山曲曰盩水曲曰屋後漢省

晉復立武德三年屬稷州貞觀元年廢稷州復屬雍州
天寶中改名宜壽後復名藍屋

姜維嶺本名沈嶺在縣南五十里蜀後主延熙二十年
大將軍姜維率衆出駱谷經沈嶺即此也

望仙澤在縣東南三十五里中有龍尾堆

隋宜壽宮在縣東南三十二里

秦長楊宮在縣東南三十三里漢武帝好自擊熊羆司

馬相如從至上林上疏諫

秦五柞宮在縣東南三十八里

馬融讀書臺在縣東北二十七里

司竹園在縣東十五里史記曰渭川千畝竹今按園周迴百里置監丞掌之以供國用義寧元年義師起高祖第三女平陽公主舉兵于司竹園號娘子軍

駱谷關在縣西南一百二十里武德七年開駱谷道以通梁州在今關北九里貞觀四年移于今所

駱谷道漢魏舊道也南通蜀漢魏少帝正始四年曹爽

伐蜀諸軍入駱谷三百餘里不得前進牛馬驢羸以轉運死者畧盡少帝甘露三年蜀將姜維出駱谷圍長城亦此道也

樓觀在縣東三十七里本周康王大夫尹喜宅也穆王為召幽逸之人置為道院相承至秦漢皆有道士居之晉惠帝時重置其地舊有尹先生樓因名樓觀武德初改名宗聖觀事具樓觀本記及先師傳焉

武功縣 畿東至府一百四十里

漢舊縣古有郃國堯封后稷之地周平王東遷以賜秦襄公孝公作四十一縣釐美陽武功各其一也釐與郃音同字異武功蓋在渭水南今郃縣地是也按舊縣境有武功山斜谷水亦曰武功水故諸葛亮表云遣孟琰據武功水又杜彥遠云太白山南連武功山是則縣本以山水立名也武德三年分雍州之武功好時蓋屋扶風之郃四縣于今縣理置稷州因后稷所封為名貞觀元年廢州以縣屬京兆

慶善宮在縣南十八里皇家舊宅也南臨渭水武德元年置宮貞觀六年鑾駕親幸讌羣臣賦詩焉

三時原在縣西南二十里高五十丈西入扶風縣界故釐城一名武功城在縣西南二十三里古郃國也后稷祠在縣西南二十三里

姜嫄祠在縣西南二十二里

隋文帝泰陵在縣西南二十里三時原上

好畤縣 畿西南至府一百八十里

本漢舊縣在今縣理東南十三里故城是也時者神明所依止也以雍州積高神明之隲故立時以郊上帝諸神也後漢省武德二年分醴泉縣置因漢舊名屬雍州三年改屬稷州貞觀元年廢稷州復屬雍州二十一年于廢上宜縣置好時縣今縣理是也其上宜縣隋開皇十八年置貞觀八年廢

華州 華陰四輔

開元戶三萬七百八十七
元和戶一千四百三十七

鄉七十
鄉二十二

禹貢雍州之域周為畿內之國鄭桓公始封之邑其地
一名咸林春秋時為秦晉界邑長城在州東七十二里
或說秦晉分境祠華岳故築此城戰國時屬秦魏地理
志云自高陵以東皆魏分也按史記魏築長城自鄭濱
洛今州東南三里魏長城是也秦并天下為內史之地
二漢及晉為京兆之地後魏置東雍州廢帝改為華州
大業二年省華州義寧二年置華山郡武德元年復為
華州垂拱元年改為太州避武太后祖諱也神龍元年

復舊

州境

東西一百六十四里
南北一百四十里

八到

西至上都一百八十里
東至東都六百八十里

東至潼關一百二十里
東至虢州二百二十里

東北至同州八十里
南至商州山南路二百七十里

貢賦

開元貢
賦
苻苓
苻神
細辛
絹
綿

管縣三

鄭
華陰
下邳

鄭縣望郭下

本秦舊縣漢屬京兆後魏置東雍州其縣移在州西七里大業二年州廢移入州城隸屬雍州至三年以州城屋宇壯麗置太華宮縣即權移城東四年宮廢又移入城

古鄭縣在縣理西北三里興元二年新築羅城及古鄭城並在羅城內

少華山在縣東南十里

華陰縣

望西至州六十五里

本魏之陰晉邑秦惠文王時魏人犀首納之于秦秦改曰寧秦漢高帝八年更名華陰屬弘農郡後魏屬華州隋大業五年移于今理垂拱元年改曰仙掌尋復舊名長城在縣西春秋秦晉分界處

太華山在縣南八里

永豐倉在縣東北三十五里渭河口隋置義寧元年因倉又置監天寶三年左常侍兼陝州刺史韋堅開漕河

自苑西引渭水因古渠至華陰入渭運永豐倉及三門

倉米以給京師名曰廣運潭以堅為天下轉運使

二水

會于漕渠每夏大雨輒皆漲大厯之後漸不通舟

天寶中每歲水陸運米二百

五十萬石入關大厯後每歲水陸運米四十萬石入關

潼關在縣東北三十九里古桃林塞也春秋時晉侯使

詹嘉處瑕以守桃林之塞是也關西一里有潼水因以

名關又云河在關內南流衝激關山因謂之衝關謹按

秦函谷關在漢弘農縣即今靈寶縣西南十一里故關

是也今大路在北本非鈴東之要漢武帝元鼎三年楊

僕為樓船將軍本宜陽人

今武昌縣也

恥居關外上疏請以

家僮七百人徙關于新安武帝從之即今新安縣東一

里函谷故關是也而御傳所馳出于南路至後漢獻帝

初平二年董卓脅帝西幸長安出函谷關自此以前其

關並在新安其後二十年至建安十六年曹公破馬超

于潼關則是中間徙于今所今歷二處而至河潼上躋

高隅俯視洪流盤紆陵極實為天險河之北岸則風陵

津北至蒲關六十餘里河山之險迤邐相接自此西望
川途曠然蓋神明之奧區帝宅之戶牖百二之固信非
虛言也

下邳縣

望東南至州八十里

本秦舊縣地理志屬京兆注下邳秦武公伐邾戎置以
隴西有上邳故此加下也董卓遷都長安華歆求出為
下邳令即此也後魏避道武帝諱改為夏封大業二年
復舊後魏屬馮翊隋屬華州武德缺年屬同州垂拱元

年復屬華州

漢蓮勺縣故城在縣東二十二里張禹本河內人徙家

蓮勺

同州 馮翊四輔

開元戶五萬六千五百九
元和戶四千八百六十一
鄉一百二十一
鄉一百四十

禹貢雍州之域春秋時其地屬秦本大荔戎國秦獲之
更名曰臨晉魏文侯伐秦秦築臨晉今朝邑西南有故
城七國時屬魏始皇并天下京兆馮翊扶風並內史之

地及項羽滅秦為塞國立司馬欣為塞王及漢王定三秦以為河上郡復罷為內史武帝更名左馮翊魏除左字但為馮翊郡晉因之後魏永平三年改為同州禹貢云漆沮既從澧水攸同言二水至此同流入渭城居其地故曰同州

州境

東西一百一十二里
南北二百三十五里

八到

西至上都二百五十里
東至東都六百五十里

東至蒲津關六十里

南至華州八十里

西北至坊州二百五十里

貢賦

開元貢

皺紋吉莫皮二十張
賦 絹 綿

元和貢

麝香 麻黃 地黃 蒺藜子
皺紋靴 石鏃餅 寒山石

管縣七

馮翊 朝邑 韓城 白水 夏陽 澄城

郃陽

馮翊縣

望郭下

本漢臨晉縣故大荔戎城秦獲之更名舊說秦築高壘

以臨晉國故曰臨晉晉武帝改為大荔縣後魏改為華陰西魏改為武鄉置郡開皇初郡廢大業三年改為馮翊縣馮輔也翊佐也義取輔佐京師

沙苑一名沙阜在縣南十二里東西八十里南北三十里後魏文帝大統三年周太祖為相國與高歡戰于沙苑大破之其時太祖兵少隱伏于沙草之中以奇勝之後于兵立之處人栽一樹以表其功今樹往往猶存仍于戰處立忠武寺今以其處宜六畜置沙苑監

興德宮在縣南三十二里義旗將趨京師軍次于忠武園因置亭子名興德宮屬家令寺

朝邑縣

望西至州三十五里

本漢臨晉縣之地大荔國在今縣東三十步故王城是也後魏置南五泉縣西魏改為朝邑縣以北據朝坂故以名縣西南有蒲津關

河橋本秦后子奔晉造舟于河通秦晉之道今屬河西縣

長春宮後周武帝置大業十三年高祖起義兵自太原
舍于此宮休甲養士而定京邑武德二年于此置陝東
大行臺太宗居藩作鎮四年山東平乃移行臺于洛州
通靈陂在縣北四里二百三十步開元初姜師度為刺
史引洛水及堰黃河以灌之種稻田二千餘頃

苦泉在縣西北三十里許原下其水鹹苦羊飲之肥而
美今于泉側置羊牧故諺云苦泉羊洛水漿

韓城縣

上西南至州二百里

古韓國今梁國漢為夏陽縣之地韓國故城在今縣理南十八里梁國在今縣理南二十三里有少梁故城隋文帝分郃陽于此置韓城縣春秋秦晉戰于韓原即此地也

龍門山在縣北五十里

龍門戌在縣東北極險峻後周又于此置龍門關今廢

白水縣

望東南至州一百二十里

本漢粟邑縣之地屬左馮翊按粟邑故城在縣理西北

二十八里薛宣為左馮翊以栗邑縣小僻在山中其人
謹朴以頻陽令薛恭換栗邑令尹賞二縣俱大理又為
漢衙縣地春秋時秦晉戰于彭衙是也後魏文成帝分
澄城郡于此置白水縣以南臨白水因以為名隋開皇
三年罷郡縣屬同州

夏陽縣

縣西南至州一百三十里

古有葷國漢郃陽縣之地武德三年分郃陽于此置河
西縣在河之西因以為名又割同州之郃陽韓城二縣

于今縣理置西韓州取古韓國為名也以河東有韓州
故此加西貞觀八年廢西韓州以縣屬同州乾元三年
改為夏陽縣縣南有莘城即古莘國文王妃太姒即此
國之女也

澄城縣

望南至州一百里

漢徵縣也韋昭云徵音懲懲澄同聲後人誤為澄魯文
公十年秦伐晉取北徵即此城是也後魏太武七年分
邵陽縣置又于今縣理置澄城郡開皇三年罷郡以縣

屬同州

乾坑漢書溝洫志云武帝時嚴熊上言願穿洛以溉重泉以東萬餘頃于是發卒穿渠自徵引洛水至商顏下

商顏今在馮翊縣界

名曰龍首渠按州西三十里有乾坑即龍首

之尾也

王官故城在縣西北春秋傳曰俘我王官翦我羈馬

郃陽縣

望西南至州一百二十里

本漢舊縣屬左馮翊在郃水之陽詩大雅所謂在洽之

陽是也水經注曰邵陽城南有漢水東流注于河即邵水也按中漢水蒲地漢水與南漢水並在舊河西縣南五里今邵陽界內爾雅云漢出大尾下郭璞以為汾陰縣有水如車輪此水亦然周武時屬澄城郡隋開皇三年罷郡以縣屬同州

羈馬故城在縣東北二十六里

鳳翔府

岐州扶風四輔

開元戶四萬四千五百三十二
元和戶七千五百八十

鄉九十二
鄉八十八

今為鳳翔節度使理所

管鳳翔府隴州
四都管戶八千三百六

管縣十

十四

禹貢雍州之域春秋及戰國時為秦都德公初居雍即
今天興縣也至獻公始徙櫟陽始皇并天下屬內史項
羽封章邯為雍王亦此地也高祖更名中地郡復屬內
史景帝更名主爵都尉武帝太初元年更名右扶風所
以扶助京師行風化也與京兆尹左馮翊謂之三輔理
皆在長安城中後漢出理槐里即今興平縣南東七里

故槐里城是魏文帝除右字為扶風郡亦是重鎮曹公
使張郃屯陳倉建興中諸葛亮攻陳倉及郿皆不克晉
太康八年為秦國後魏太武于今州理東五里築雍城
鎮文帝改鎮為岐州隋開皇元年于州城內置岐陽宮
岐州移于今理大業三年罷州為扶風郡武德元年復
為岐州至德元年改為鳳翔郡乾元元年改為鳳翔府

府境

東西一百八十三里
南北三百八十九里

八到

東至上都三百一十里
東至東都一千一百七十里

東北至邠州二百三十里
南取太白山路至興元府六百里

西南至鳳州二百八十里
西至隴州一百五十里

北至涇州二百二十里

貢賦

開元貢

龍鬚席

蠟燭

布麻

管縣九

天興 岐山 扶風 普潤 岐陽 麟遊

寶雞 號 郿

天興縣

次赤郭下

本秦雍縣秦國都也漢縣屬右扶風四面高曰雍又四望不見四方故謂之雍秦回中宮在縣西漢文帝十四年匈奴入蕭關燒回中宮候騎至雍即此也至德二年分置鳳翔縣永泰元年廢仍改雍縣為天興縣

乾歸故城在縣西四十三里乞伏乾歸據苑川自號西秦因築此城

石鼓文在縣南二十里許石形如鼓其數有十蓋紀周宣王畋獵之事其文即史籀之跡也貞觀中吏部侍郎

蘇勗紀其事云虞褚歐陽共稱古妙雖歲久訛缺遺迹尚有可觀而歷代紀地理志者不存記錄尤可歎惜

岐山縣

次畿西至府五十里

本漢雍縣之地周武帝天和四年割涇州鶉觚縣之南界置三龍縣開皇十六年移三龍縣于岐山南十里改為岐山縣貞觀八年移于今理

岐山亦名天柱山在縣東北十里

渭水在縣南三十里

五將山在縣西北六十里苻堅為姚萇將吳忠所擒之處

扶風縣

次畿西至府一百里

本漢美陽縣地武德三年分岐山縣置圍川縣屬岐州
取今縣南漳川水為名近代訛作圍四年隸入稷州貞
觀元年廢稷州以縣屬岐州八年改為扶風

普潤縣

次畿南至府九十里

隋大業元年于此置馬牧又置普潤屯後廢屯置縣在

漢為漆縣并有鐵官今城西有漆水又有小城蓋置鐵官處

岐陽縣

次畿西南至府一百里

蓋漢杜陽縣地貞觀七年割扶風岐山二縣置以在岐山之南因以名之

麟遊縣

次畿西南至府一百六十里

本漢杜陽縣地隋于此置西麟州營仁壽宮義寧元年唐高祖輔政廢宮是年獲白麟于宮所因置縣

九成宮在縣理西一里即隋文帝所置仁壽宮每歲避暑春往冬還義寧元年廢宮置立郡縣貞觀五年復修舊宮以為避暑之所改名九成宮

永安宮在縣西三十里貞觀八年置

寶雞縣

次畿東北至府九十里

本秦陳倉縣秦文公所築因山以為名屬右扶風大業九年移于今理在渭水北乾元二年改為寶雞以昔有陳寶鳴雞之瑞故名之

陳倉故城在今縣東二十里即秦文公所築魏畧云太和中將軍郝昭築陳倉城適訖會諸葛亮來攻亮本聞陳倉城惡及至怪其整頓聞知昭在其中大驚愕亮素聞昭在西有威名念攻之不易初太原靳詳少與昭相親後為蜀所得及亮圍陳倉詳為亮監軍使于城外呼昭喻之昭于樓上應詳曰魏家科法卿所練也我之為人卿所知也曩時高剛守祁山坐不專意雖終得全于今謂議不止我必死耳卿還謝諸葛亮便可攻也詳以

告亮亮進兵雲梯衝車晝夜距二十餘日亮無利會費
曜等救至亮乃引去按今城有上下二城相連上城是
秦文公築下城是郝昭築

陳倉山在縣南十里南接梁鳳二州界

散關在縣西南五十二里蜀志諸葛亮相距所築
三交城在縣西十六里司馬宣王與諸葛亮相距所築
咸亨三年于縣東南開渠引渭水入昇原渠通船至京

故城

即故長安城漢惠帝所築城
在今故大興城之西北苑中

號縣

次畿北至府三十里

古號國周文王弟號叔所封是曰西號後秦武公滅為縣周改為洛邑縣大業二年復為號縣貞觀八年廢天授二年再置

郿縣

次畿西北至府一百里

本秦縣右輔都尉理所在今縣東一十五里有故城今縣周天和元年築置雲州建德三年廢武德元年又于故城置郿州三年廢州郿縣屬稷州七年屬岐州白起

即此縣人也縣在渭水南一里

終南山在縣南三十里

太白山在縣東南五十里

五丈原在縣西南三十五里初諸葛亮與司馬宣王相持亮據渭水南原宣王謂諸將曰亮若出武功依山東轉是其勇也若西上五丈原諸君無事矣亮果屯此原耕者雜于渭濱居人安堵軍無私焉

積石原在縣西北二十五里魏青龍二年諸葛亮出斜

谷與司馬宣王屯渭南郭淮算亮必爭北原遂先據之
亮至不得上即此原也

縣理城亦曰斜城城南當斜谷因以為名斜谷南口曰
褒北口曰斜

董卓塢在縣東北十六里卓封郿侯築塢高與長安塢
號為萬歲塢

成國渠在縣東北九里受渭水以溉田

隴州

汧陽上

開元戶六千八十五
元和戶七千八十四

案前華州同州鳳翔府戶數下俱有鄉數惟京兆府與此隴州無之殆由傳寫遺缺今不可攷

禹貢雍州之域秦文公所都漢為汧縣屬右扶風後魏置東秦州西魏文帝改名隴州因山為名大業二年省義寧二年又于縣理置隴東郡武德元年改為隴州

州境東西二百里
南北四百九十五里

八到東至上都四百六十里
東至東都一千三百二十里

東至鳳翔府一百五十里
南至鳳州山路四百三十里

西至秦州三百四十里
北至原州三百三十里

貢賦

開元貢賦

榛實

龍鬚席五領

布麻

管縣五

汧源 汧陽 吳山 華亭 南由

汧源縣 上郭下

本漢汧縣地屬右扶風在汧水之北後魏改為汧陰縣
隋改為汧源縣

隴山在縣西六十二里

岍山在縣西六十里北與隴山接禹貢導岍及岐是也
大震關在州西六十一里後周置漢武至此遇雷震因
名

秦城在州東南二十五里秦非子養馬汧渭之間有功
周孝王命為大夫

汧陽縣 上西至州八十里

本漢隃麋縣地因今縣東八里隃麋澤為名周武帝置
汧陽郡及縣尋省郡以縣屬隴州

汧水在縣南一里

吳山縣

中西北至州一百一十里

本漢隴麋縣地後魏孝昌二年于長蛇川置長蛇縣屬東秦州開皇十八年改為吳山縣

吳山在縣西南五十里秦都咸陽以為西嶽今為國之西鎮山國語謂之西吳

華亭縣

下正南微東至州一百一十里

本秦涇陽縣地大業元年置華亭縣以在華亭川口故

名

小龍山在縣西四十里

南由縣

下東北至州一百二十里

本漢沔縣地後魏孝明帝于縣西南由谷口置縣因谷
為名開皇二年省長蛇縣併入南山屬岐州貞觀四年
割入隴州

安夷關在縣西一百四十六里

長蛇川在縣西一百步

渭水在縣南四十里

元和郡縣志卷二

欽定四庫全書

元和郡縣志卷三

唐 李吉甫 撰

關內道 三

涇州 安定上

開元戶一萬五千九百五十二 鄉五十五
元和戶一千九百九十 鄉三十

今為涇原節度使理所 管涇州原州
管縣九

案前鳳翔節度使理所下有都管戶數而此與後
邠寧靈武諸節度使理所下無之皆由傳寫遺缺

禹貢雍州之域春秋時屬秦至始皇分三十六郡屬北地郡漢分北地郡置安定郡即此是也漢以六郡良家子補羽林郎按六郡安定即其一焉後漢安帝永初五年徙其人于美陽以避羌寇郡寄理美陽在今武功縣界夷陽故城是也至順帝移于今理後魏太武帝神䴥三年于此置涇州因水為名隋大業三年改為安定郡大業末金城賊帥薛舉侵擾幽涇武德元年太宗西討會舉死因平舉子仁果遂改安定郡為涇州

州境

東西一百九十六里
南北二百八十六里

八到

東南至上都四百八十里
東南至東都一千三百四十里

東南至邠州一百八十里
南至鳳州二百五十八里

西南至隴州私路一百八十里
西北至原州平涼縣一百五十里

北至原州城三百三十里
北至慶州三百二十三里

東北至寧州一百五十里

貢賦

開元貢
龍鬚席
布麻

管縣五

保定 靈臺 臨涇 良原 潘原

保定縣 上郭下

本漢安定縣地今臨涇縣安定故城也後漢省後魏文帝大統元年自高平移城于今理屬安定郡隋開皇三年罷郡以縣屬涇州至德二年改保定縣

涇水在縣東一里

折塢故城在縣東十里西魏涇州刺史乙弗貴所築隋末薛舉屯據于此城舉死仁果復竊據武德元年討平

之

万俟醜奴餘蹟在縣東五里醜奴高平人後魏建義元年僭號于此

靈臺縣

上西至州一百里

本漢鵠鬴縣屬北地郡周屬趙平郡隋開皇三年屬涇州天寶元年改為靈臺縣今縣理西陰密故城東接縣城即古密國之地是也詩云密人不共

臨涇縣

上東南至州九十里

本漢舊縣屬安定郡隋大業元年于今縣理置秋谷縣
取縣内秋谷為名十二年復為臨涇縣皇朝因而不改
按縣在彭陽川内彭陽水上百步縣界兼有漢安武安
定彭陽撫夷四縣之地也

良原縣

上東北至州六十里

本漢三水縣地屬安定郡今安定縣界三水故城是也
隋大業元年分安定縣之地置良原縣縣西南三十里
有良原因以為名

汭水一名宜祿川西自隴州華亭縣流入

石原在縣西南即所謂良原也

潘原縣

中東至州一百里

本漢陰盤縣屬安定郡在今邠州宜祿縣西二十三里
陰盤故城是也地有陰盤

原州

平涼中都督府

禹貢雍州之域春秋時地屬秦始皇時屬北地郡漢為

安定郡

案此下志文與戶鄉數及州境並傳寫遺缺

八到

東南至上都八十里
東南至東都一千六百六十里

東南至涇州三百二十里

東至秦州四百六十里

西至會州三百九十里

正西微南至臨洮軍六百二十里

北至靈州五百里

貢賦

開元貢
賦
覆鞍氈
布
麻

管縣四

平高 平涼 百泉 蕭關

平高縣

望郭下

本漢高平縣屬安定郡後魏太武帝太延二年于今縣
理置平高縣屬平高郡隋開皇三年罷郡以縣屬原州
大業三年以原州為平涼郡武德元年重為原州縣仍
屬

舜頭山一名崆峒山在縣西一百里即黃帝謁廣成子
學道之處史記曰黃帝東至于海西至崆峒登舜頭是
也漢書曰舜頭山在涇陽西禹貢涇水所出莊子云廣
成子學道崆峒之山又後漢書隗囂使將王孟塞雞頭

道即此也

木破關在縣西南四十里

蕭關故城在縣東南三十里漢書文帝十四年匈奴入蕭關殺北地都尉是也

瓦亭故關在縣南七十里即隴山北垂隗囂使牛邯軍瓦亭即此是也

秦長城在縣北十里

朝那湫郊祀志云湫泉祠那蘇林云在安定朝那縣方

四十里冬夏不增減不生草木旱時即祀之以壺澆水
置之于所在則雨雨不止反水于泉俗以為恒今周迴
七里蓋近代減耗

監牧貞觀中自京師東赤岸澤移馬牧于秦渭二州之
北會州之南蘭州狄道縣之西置監牧使以掌其事仍
以原州刺史為都監牧使以管四使南使在原州西南
一百八十里西使在臨洮軍西二百二十里北使寄理
原州城內東宮使寄理原州城內天寶中諸使共有五

十監

南使管十八監西使管十六監
北使管七監東宮使管九監

監牧地東西約六百里南北約四百里天寶十二年諸
監見在馬總三十一萬九千三百八十七匹內一十三
萬三千五百九十八匹課馬

平涼縣

上西北至州一百六十里

本漢涇陽縣地今縣西四十里涇陽故城是也後魏為
長城郡長城縣之地周武帝建德元年割涇州平涼郡
于今理置平涼縣屬長城郡隋開皇三年屬原州皇朝

因之開元五年移于涇水南貞元七年又移于舊縣南坂上今縣是也仍屯軍其中

馬屯山在縣西

案此下似缺里數

十六國春秋云姚萇與苻登

戰于高平登敗奔于馬屯山即此也其山南北二十里

東西三十里

百泉縣

上西至州九十里

本漢朝那縣地故城在今縣理西四十五里後魏孝明帝于今縣西南陽晉川置黃石縣隋煬帝改為百泉縣

武德八年移于今所

可藍山一名都廬山在縣西南七十里十六國春秋曰
赫連定據平涼登可藍山望統萬城泣曰先帝若以朕
承大業豈有今日

涇水源出縣西南涇谷地理志云涇陽縣筭頭山涇水
所出淮南子云筭頭山一名薄落山故涇水亦曰薄落
水又南流經都廬山山路之中常如彈箏之聲故行旅
因謂之彈箏峽

蕭關縣 中南至州一百八十里

本隋他樓縣大業元年置神龍三年廢別立蕭關縣以
去州闊遠御史中丞侯全德奏于故白草軍城置因取
蕭關為名

蔚茹水在縣之西一名葫蘆河源出原州西南顏沙山
下

邠州 新平緊

開元戶一萬九千四百六十一 鄉四十九
元和戶二千六百七十 鄉四十九

今為邠寧節度使理所

管邠州寧州慶州
管縣二十

禹貢雍州之域周之先公劉所居之地詩大雅云篤公劉于豳斯館是也周本紀曰后稷子不窋末年夏政衰奔戎翟之間至孫公劉修后稷之業乃國于豳徐廣云新平漆縣東北有豳亭是也按豳國城在今州理東北二十九里三水縣界古豳城是也自周東遷其地屬秦秦并天下分三十六郡屬內史漢屬右扶風今州理即漢右扶風之漆縣也漆水在今縣西九里西北流注于

涇今鳳翔府麟遊縣東西亦有一漆水與此異也後漢
于此置新平郡及姚萇之亂百姓夷滅此地郡縣並無
理所至後魏又置郡焉文帝大統十四年于今理置南
豳州廢帝除南字隋大業二年省入寧州義寧二年復
為新平郡武德元年復為豳州開元十三年以豳與幽
字相涉詔曰魯魚變文荆并誤聽欲求辨惑必也正名
改為邠字天寶元年改為新平郡乾元元年復為邠州

州境

東西二百里
南北二百七十里

八到

東南至上都三百里
東南至東都一千一百六十里

東至坊州三百一十里

南至奉天縣一百三十里

西北至涇州一百八十里

北至寧州一百四十里

貢賦

開元貢
蕈豆 白蠟
賦 布 麻

管縣四

新平 三水 永壽 宜祿

新平縣

望郭下

本漢漆縣也屬右扶風建武八年隗囂悉衆攻略陽上

至漆進止未定會馬援夜至上喜問之援聚米以為山谷于上前指軍所從入上笑曰虜在我目中遂進兵攷諸記注漢之漆縣即今州理是也姚萇之亂郡縣不立暨乎後魏于今縣西南十里陳陽原上置白土縣屬新平郡隋開皇三年罷郡移白土縣于今州城中置豳州四年改白土縣為新平縣大業二年省豳州入寧州義寧二年復為新平郡武德元年以新平郡又為豳州縣屬焉

五龍原在縣東三里原側有五泉水因名

涇水西北自宜祿縣界流入

索立堡在縣西十八里東西南三面石坡峭峻高十丈
北面築城高二丈武德二年置貞觀元年廢

符堅墓在縣東南二里先有謠云河水清復清符詔死
新城堅聞惡之語軍候曰地名新城避之至是為姚萇
殺于新平城遂葬焉

三水縣

緊西南至州六十里

本漢舊縣有鐵官屬安定郡以縣界有羅川谷三泉並流故以為名魏改三水縣為西川縣亦屬安定後魏于今縣理西二十八里重置三水縣取漢舊名屬新平隋開皇三年罷郡以縣屬豳州皇朝因之

石門山在縣東五十里峯岩相對望之似門

柁邑故城在縣東二十五里即漢柁邑縣屬右扶風古邠國也左傳云畢原豐邠文之昭也

古豳城在縣西三十里公劉始都之處

永壽縣

上西北至州九十里

武德二年分新平縣西界于今理北三十里永壽原西
分置永壽縣因原而名貞觀二年移于州東南八十里
興元元年又移于順義店即今理是也本漢漆縣之南
界也

高泉山亦曰甘泉在縣北二十五里

涇水自新平縣界流入

醴泉苑在縣東北十里并宮並周所立後廢貞觀四年

置醴泉監兼置屯五所隸司農寺

宜祿縣

中東至州八十一里

本漢淺水縣地屬上郡後魏為東陰盤縣地廢帝以縣南臨宜祿州因改名隸涇州暨周隋又為白土縣貞觀二年分新平縣又置宜祿縣復魏舊名也

淺水原即今縣理所初金城人薛舉稱兵攻破郡縣武德元年舉寇涇州屯兵于安定縣之折墪城太宗親征相守六十餘日會舉死其子仁果統其衆并羌胡十餘

萬數來挑戰上遣總管龐玉自此原南出賊之右因高而陳上率大兵自原北出其不意斬首萬餘級賊大潰仁杲懼而請降俘其精兵萬餘人男女五萬口故城猶在今縣北五里

陰盤城在縣西北二十五里

昭仁寺在縣西十步淺水原上王師討平仁杲詔于此置寺碑諫議大夫朱子奢之詞也

長武城在縣西五十里隋開皇中築在涇河南岸武德

元年廢大厯初郭子儀置兵以備西戎

寧州 彭原望

開元戶三萬二百二十六
元和戶一千一百七

鄉七十三
案鄉數傳寫缺

禹貢雍州之域古西戎地也當夏之衰公劉邑焉周時
為義渠戎國其後戎狄攻太王亶父避于岐山腳而作
周按今州理城即公劉邑地也後西北伐犬戎武王都
鎬逐戎夷于涇洛之北以時入貢命曰荒狄周道衰荒
狄不至後幽王為犬戎所殺至秦繆公得由余西戎八

國來至秦昭王殺義渠戎王并其地始皇分三十六郡
此為北地郡即義渠舊地也漢氏因之後漢移北地郡
居富平故城是也後魏延興二年為三縣鎮孝文帝太
和十一年改置班州十四年改為邠州二十年改邠為
豳取地名也廢帝三年改豳州為寧州以撫寧戎狄為
名後周改為北地郡隋又為寧州大業中又為郡武德
元年復為寧州貞觀元年改為都督府四年又廢府為

州

州境

東西二百一十六里
南北五百一十四里

八到

東南至上都四百五十六里
東南至東都一千三百里

東至坊州三百二十里
南至邠州一百四十里

西至涇州一百五十里
北至慶州一百三十里

貢賦

開元貢
龍鬚席
賦
布
麻

管縣六

安定 真寧 襄樂 彭原 定平 豐義

安定縣

望郭下

本漢泥陽縣在今縣理東南十五里泥陽故城是也至後魏太武帝置安定縣取定俗安人為義在今縣理北西三里定安故關自隋開皇三年移縣入廢趙興郡理仍屬寧州皇朝因之

扶蘇墓在縣西北十八里始皇太子也監蒙恬築長城始皇崩李斯矯詔賜死葬于此

真寧縣

緊西北至州七十里

本漢陽周縣地屬上郡漢書陳餘與章邯書曰蒙恬為

秦將北逐戎人開榆中地數千里竟斬陽周謂此縣也
後魏置泥陽惠涉二護軍孝文帝太和十一年復置陽
周縣隋開皇十八年改為羅川因縣南羅水為名屬寧
州皇朝因之天寶元年改為真寧縣

子午山亦曰橋山在縣東八十里黃帝陵在山上即羣
臣葬衣冠之處史記曰漢武帝北巡朔方還祭黃帝冢
于橋山曰吾聞黃帝不死今有冢何也或對曰黃帝已
上仙羣臣葬其衣冠故有冢

襄樂縣

緊西南至州六十里

本漢襄洛縣屬上郡後魏孝文帝改洛為樂屬襄樂郡
後周屬北地郡隋開皇三年改屬寧州皇朝因之

秦故道在縣東八十里子午山始皇三十年向九原抵
雲陽即此道也

彭原縣

緊南至州一百里

本漢彭陽縣地在今縣理西南六十里臨涇縣界彭陽
故城是也暨于後漢又為富平縣之地後魏破赫連定

後于此復置富平縣廢帝改為彭陽縣屬西北地郡隋
開皇三年罷郡以縣屬寧州十八年改為彭原縣因彭
池為名原南北八十一里東西六十里

定平縣

上北至州七十里

自漢至晉並泥陽縣地後魏至周並為安定縣地隋大
業十年于此築城置棗社驛武德二年于驛分安定縣
置定平縣其驛移出城北

豐義縣

上東南至州八十里

本漢彭陽縣地今縣理西四十里彭陽故城是也後魏于縣理置雲州周武帝保定二年廢州為防隋文帝廢防名為豐義城武德二年分彭原縣置豐義縣因舊城為名屬彭州貞觀元年州廢縣屬寧州

慶州 順化都督府

開元戶一萬七千九百八十一 鄉五十一
案元和戶鄉數傳寫缺

禹貢雍州之域古西戎地周本紀曰夏氏政衰后稷子不窋奔戎狄之間今州理東南三里有不窋故城是也

春秋及戰國時為義渠戎國秦厲公伐義渠并之虜其
王至始皇時屬北地郡按今州理即漢郁郅城地理志
屬北地郡後漢郡境為虜所侵北地郡寄寓馮翊後魏
文帝大統十一年置朔州周武帝保定元年廢朔州為
周武防隋文帝開皇三年改置合川鎮十六年割寧州
歸德縣置慶州立嘉名也義寧元年為弘化郡天寶元
年改為安化郡至德元年改為順化郡乾元元年復為
慶州

州境

東西二百五十三里
南北四百七十二里

八到

東南至上都五百七十里
東南至東都一千四百三十里

東至鄜州三百九十里
南至寧州一百二十七里

西至原州三百四十里
西北至靈州六百二十里

北至鹽州五百七十二里
東北至延州四百四十里

貢賦

開元貢
賦
牛蘇
麝香
胡布

管縣十

順化 樂蟠 馬領 合水 華池 同川

洛源 延慶 方渠 懷安

順化縣

中郭下

本漢郁郅縣後漢迄晉戎虜所侵不立州縣後魏及周以為鎮防隋開皇十六年于今州城西南一里置合水縣在馬領白馬二水口因以為名屬慶州大業二年以慶州為弘化郡合水屬焉至武德二年改合水為合川縣取隋合川鎮為名貞觀元年改為弘化縣天寶元年改為安化縣至德元年改為順化縣

不窋墓在縣東二里

樂蟠縣

中北至州三十二里

本漢畧畔道地今縣理北五里略畔故城是也後漢及
晉為虜所侵逼此地無復郡縣後魏文帝于此置蔚州
周武帝置北地郡隋開皇二年罷郡以彭陽襄樂二縣
屬寧州義寧元年分合水縣置樂蟠縣屬弘化郡取樂
蟠城為名也百官表云縣有蠻夷曰道按畧畔樂蟠皆
指此城方言訛舛故不同耳

馬領縣 中東南至州六十七里

本漢舊縣屬北地郡漢末為虜所侵至後魏為朔州之

地隋大業元年分合水縣于此置馬領縣復漢縣之舊

名也 案漢書地理志馬領縣顏師古注曰川形似馬領

皆後人所改師古注漢書于貞觀中是時縣名必仍舊作馬領十三年陷賊縣廢義寧

二年于今縣理北四十里百家堡置馬領縣屬弘化郡

以縣西一里有馬領坂因名

秦長城在縣西北一百二十六里即蒙恬所築也

合水縣

中西至州五十里

本漢略畔道之地在今縣西南三十八里故城是也自後漢至晉此地皆無郡縣至後魏為襄樂縣之地武德六年分合水縣置蟠交縣以城臨大小樂蟠二水交口因以為名天寶元年改為合水縣

華池縣

下西南至州一百五十里

本漢歸德縣地也按漢歸德縣今洛源縣是隋仁壽二年于今縣東北二里庫多汗故城置華池縣因縣西華

池水為名屬慶州皇朝因之

子午山舊名翟道山在縣西四十五里

同川縣

中下東至州八十里

本漢郁郅縣地隋義寧二年分寧州之彭原縣西南十五里三泉故城置三泉縣屬弘化郡武德元年改為慶州縣屬焉仍改為同川因同川城為名

洛源縣

中下東南至州二百七十五里

本漢歸德縣地屬北地郡後漢更始二年封岑彭為歸

德侯謂此地也後漢迄晉無復郡縣後魏文帝大統元年復置歸德縣隋大業元年改為洛源縣因洛水所出為名皇朝因之

洛水源出白於山一名女郎山在縣北三十里

延慶縣

中南至州四十里

本漢郁郅縣地後魏于今縣理置朔州隋開皇中改置合水縣武德六年移豐州戶住此仍分合水縣置白馬縣以西臨白馬川水為名天寶元年改名延慶縣

方渠縣

中下東南至州一百八十里

古慶匡州倉在馬領川內因渠為名景龍元年置取漢

縣為名縣西北馬領山諸谷水東南流經縣新置方渠

堡因名之

案方渠本漢縣舊名屬北地郡後漢廢隋為慶州馬領縣地唐景龍元年分置方渠縣此


云古慶匡州倉在馬領川內因渠為名又云新置方渠堡因名之意義未明疑有脫訛

懷安縣

下南至州一百六十里

右居近党項藩落開元十年檢逃戶所置故以懷安為

名



元和郡縣志卷三